



Dat Plattdüütskbüro kriggt Nawass: Vera Hansen is de Upfolgerske van Anita Willers

Siet Anfang Januarmaant arbeitet Vera Hansen in dat Plattdüütskbüro van de Oostfreeske Landskupp. Se kummt na up Anita Willers, de na over 30 Jahr in dat Plattdüütskbüro up Renten gahn is. De Upgaven van Vera Hansen sünd Spraakberaden, Oversettens un algemeen Büroarbeiten. Butendeem arbeitet se för de Vereen Oostfreeske Taal.

[Hier giff dat mehr to weten!](#)



Lehrbook in de tweede Uplaag rutkomen

De eerst Uplaag van dat Lehrbook „Snacken. Proten. Kören.“ för de Sekundarbereck I, dat in dat lest Jahr för de Unnerricht in oostfreeske Platt rutkomen is, is al vergrepen. För de Druck van en tweede Uplaag, dat sünd 1.000 Stück, hett dat Nedersasske Kultusministerium 10.000,00 € geven. Vanwegen disse Deiten können oostfreeske Scholen dat Lehrbook umsünst as Klassensatz bi dat Plattdütskbüro van de Oostfreeske Landskupp kriegen. Dat gellt för Scholen, de Plattdütsk as Wahlplichtfack of as Unnerrichtsfack anbeden willen.

Hier giff dat mehr to weten!



Ellen Jones wiest Doktorarbeit

An de 24. Januar 2025 hett Ellen Jones, Doktorandin an de University of Texas/USA, dat Team van dat Plattdüütskbüro hör Dissertation mit de Titel „De Spraak achter Pott un Ploog: Gender and Identity in the Maintenance and Loss of Low German“ vörstellt. As se in hör Schooltied teihn Maant bi en Gastfamilie in Rhaderfehn west is, hett Froo Jones neet blot hör Leevde för Oostfreesland, man ok för de Regionaalspraak Plattdüütsk entdeckt. Daarum hett se sük entscheddt, hör Doktorarbeit over Plattdüütsk to schrieven: Wo word dat bruukt un wat is de Instellen daarto? Daarför weer se 2023 en paar Maant in Oostfreesland un hett en Umfraag un en paar Interviews maakt. Wat bi hör Umfraag rutkamen is, stimmt mehr of minner mit dat overeen, wat dat Plattdüütskbüro 2023 mit en Unnersöken to de Fraag, wo vööl Platt noch proot of verstahn word, rutfunnen hett. Ok bi Froo Jones kweem rut, dat jung Lüü mehr Platt proten un verstahn, as to verwachten weer.

De Dissertation word in Februarmaant in Austin verteidigt. Middent token Jahr giff dat de Ergeevnissen up de Webbsteer van dat Plattdüütskbüro bi „Downloads“.



Leestexten för de Plattdütske Leesweddstried 2025

Well för de Plattdütsk Leesweddstried noch Texten to vörlesen söcht, findt nu för elke Oller wat up de Webbsteer van dat Plattdütskbüro bi „Downloads“. Daarto giff dat ok Audiodateien. Heel neei: Oll herbrocht Märken in oostfreesk Platt. Kiekt eenfach maal rin!

To runnerladen van dat Plattdütskbüro

Bildhenwiesen:

Bild 1: Grietje Kammler un Vera Hansen vör dat Landskuppshuus (Foto: Sebastian Schatz, Oostfreeske Landskupp).

Bild 2: Landskupspräsident Rico Mecklenburg, Anja Enninga, Mesterske an de Hermann Tempel Gesamtschule IGS Ihlow un Fackberaderske för de Erlass „Die Region und die Sprachen Niederdeutsch und Saterfriesisch im Unterricht“ bi dat Regionaal Landesamt för Scholen un Bildung Osnabrück, Grietje Kammler, Baas van dat Plattdütskbüro, Imke Schöneboom, Fackberaderske för de Erlass „Die Region und die Sprachen Niederdeutsch und Saterfriesisch im Unterricht“ bi dat Regionaal Landesamt för Scholen un Bildung Osnabrück, Evelyn de Vries, Schoolfackelke Dezerementin bi dat Regionaal Landesamt för Scholen un Bildung Osnabrück un Landskuppdsdirektor Dr. Matthias Stenger bi dat Vörstellen van de neei Uplaag van dat Lehrbook „Snacken. Proten. Kören.“ (Foto: Sebastian Schatz, Oostfreeske Landskupp).

Bild 3: Ellen Jones un hör Gastmoder Petra Niemeyer tüsken Vera Hansen, Elke Brückmann, Ilse Gerdes un Grietje Kammler van dat Plattdütskbüro (Foto: Sebastian Schatz, Oostfreeske Landskupp).

Bild 4: Plattdütsk Literatur för Kinner (Foto: Grietje Kammler, Oostfreeske Landskupp).



Hier können Sie einstellen, welche Newsletter Sie von uns erhalten möchten.

Ostfriesische Landschaft
- Körperschaft des öffentlichen Rechts -
Georgswall 1 – 5
26603 Aurich

Telefon: 04941 1799-0

E-Mail: ol@ostfriesischelandschaft.de

Redaktionell verantwortlich:
Dr. Matthias Stenger, Landschaftsdirektor

[Klicken Sie hier, um sich von allen Landschafts-Newslettern abzumelden.](#)